

Uunga siunnersuut: UPA 2019/208 – Tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuseqartarneq pillugit Inatsisartut Inatsisaat nr. xx, xx. xxx 2019-imeersoq

(Peqqissutsimut Isumaginninnermut Inatsisinullu Atuutsitsinnermut Naalakkersuisoq)

Saqqummiussissut

(Peqqissutsimut Isumaginninnermut Inatsisinullu Atuutsitsinnermut Naalakkersuisoq)

Siullermeerneqarnera

Naalakkersuisut sinnerlugit manna tarnimikkut napparsimasunik nammineersinnaajunnaarsitsisarneq allatigullu pinngitsaaliissummik iliuseqartarneq pillugit Inatsisartut Inatsissaattut siunnersuut saqqummiutissavara.

Tarnimigut nappaatillip nammineersinnaajunnaarsitaanermut allatigullu pinngitsaaliissummik iliuseqarfigineqarnermut atatillugu, inatsisitigut inissisimanerata nukittorsarneqarnissaa, Inatsisissatut siunnersuummi saqqummiunneqartumi siunertaavoq. Inatsisissatut siunnersuummi tarnimigut nappaatillip sapinngisaq tamaat katsorsartinnermut imminullu tunngasunut allanut peqataatinneqarnissaa sunniuteqarnissaalu qulakkeerneqassaaq. Napparsimavimmud / peqqinnissaqarfimmi immikkoortuanut unitsitaanermut-, uninnganermut- katsorsartinnermullu atatillugu pinngitsaaliinikkut iliuseqarnissamut piumasaqaatit sukannernerulernerannik ersarinnerulernerannillu, Inatsisissatut siunnersuut nassataqassaaq.

Peqqinnissaqarfimmi tarnimikkut nappaatilinnik katsorsaaniarnermi, peqqinnissamik sullissit ikiuilluarsinnaaqullugit, pisuni ataasiakkaani katsorsaaneermut atatillugu pinngitsaaliissummik iliuseqartartariaqartarpoq, ilaannilu- napparsimasoq nappaammunik paasisimanninngippat- pinngitsaaliissummik unitsitsisoqartartariaqarsinnaasarluni.

Napparsimasup nammineersinnaassusaanut ataqqinninneq, nappaammunik peruluutillit katsorsartinnissamik pisariaqartitsisut nappaateqarnerminnilli paasisimanninngitsut, sumiginagaanerannik kinguneqanngisaannassaaq. Pisariaqarpat pinngitsaaliissummik unitsitaanikkut, nammineq saaffiginnissutigisinnaanngisamik naammaginartumik katsorsartinnissamut tungiorneqarnissamullu inatsisissatut siunnersuut, tarnimikkut nappaatilinnut pineqartunut periarfissiinnngippat, tamanna sumiginnaanertut isigisariaqarpoq. Pinngitsaaliinerli inuup nammineersinnaassusaanut innarliinerummat, inatsisitigut illersugaaneq eqqarsaatigalugu aalajangiinnermi tunngaviit piumasaqaatillu ersarissarluakkat naapertorlugit pinngitsaaliisoqartarnissaanik qulakkeerinninnissarput pingaaruteqarpoq. Pinngitsaaliissummik iliuseqarnerup inatsisitigut illersorneqarsinnaanerata kiisalu ikiuullunilu tapersersuisumik illersuisoqartinneqarnerup nalilivigineqartuarnissaa pingaaruteqarportaaq. Tarnimigut nappaatillip pinngitsaaliissummillu iliuseqarfigineqartup, katsorsartinnerata isumannaatsumik ingerlanneqarnissaanut inatsisitigut sakkortuunik qularnaveeqqusigaanissaa, taamaasiornitsigut qulakkiissavarput.

Tarnimikkut napparsimasut pillugit inatsiseqarneq Tarnimikkut nappaatilinnik nammineersinnaajunnaarsitaaneq allatigullu pinngitsaaliissummik iliuseqarneq pillugu Inatsisartut Inatsisaata allangortinnera pillugu Inatsisartut inatsisaat nr. 12, 3. juni 2015-imeersumit iluamik iluarsartuunneqarpoq. Siunnersuut manna misilittagaalersut allangortitariaqartullu katersorpaat ilaatigut Inatsisartut ombudsmandiat aamma Folketingip § 71 tilsyn pissutigalugu.

Siunnersuummi tarnimikkut napparsimasut pillugit inatsimmi atuuttumi tunngaviusut ingerlateqqinneqarput, kisianni aammattaaq allannguutininik arlaqartunik ilaqartunik.

Siunnersuummi periarfissaliissut pisariaqartoq pilersinneqarpoq, tassa nakorsat allat Dronning Ingridip Napparsimavissuani tarnimikkut nappaatilinnut immikkoortortaqaarfianni nakorsaaneq peqanngitsillugu pisuni arlalinni tarnimikkut napparsimasut pillugit inatsit naapertorlugu aalajangiisinnaapput, taakkua tamatuma kingornatigut nakorsaanermit akuersissutigineqartussanngortillugit.

Tamatuma saniatigut siunnersuummi ilaavoq pinngitsaaliissummik nakorsaatitortitsinermit nakorsaatip toqqarneqartup sunniutaata saniatigut allamik sunniuteqarneranut qanoq naleqqius-sinissamut erseqqissaat.

Taamatutaaq oqaaseqatigiinnik aaqqissuussisoqarpoq aamma naleqqussaasoqarluni tamatumani siunertarineqarluni inatsisip imarisaanik erseqqissaaneq aamma paasiuminar-saaneq.

Taamatut oqaaseqarlunga siunnersuut Inatsisartuni suliassanngortillugu ingerlateqqippara.